

У Роббингиз ҳузуридан келгандир | Қуръони Карим дарслари (158-дарс)



19:00 / 23.06.2025 1757

Аллоҳ таоло шундай марҳамат қилади:

«Эй одамлар! Батаҳиқ, сизга Роббингиздан мавъиза, кўклардаги нарсага шифо, мўминларга ҳидоят ва раҳмат келди», деган («Юнус» сураси, 57-оят).

Эй одамлар! Қуръонни ёлғон деманг! Қуръонни фалончи тўқиган, деманг! Унинг тўғрисида шубҳа қилманг!

«Сизга Роббингиздан мавъиза» келди.

У сизларга икки дунё бахтига эришишингиз учун керакли мавъизалар, панд-насихат ва кўрсатмалар йўллади.

Бу Қуръон оддий Китоб эмас, у Роббингиз ҳузуридан **«кўкслардаги нарсага шифо»** бўлиб келгандир.

У қалбингиздаги руҳий, маънавий дардларингизнинг барчасига шифо бўлиб келди. Шулар қаторида сизнинг ичингиздаги **«мўминларга ҳидоят ва раҳмат келди»**.

Ким Қуръонга иймон келтириб, мусулмон бўлса, у ўша одамни ҳидоятга бошлайди, Аллоҳнинг раҳматига эриштиради.

Аллоҳ таоло яна:

«Агар сенга Биз нозил қилган нарсадан шакда бўлсанг, сендан олдин китобни ўқиганлардан сўра. Батаҳқиқ, сенга Роббингдан ҳақ келди. Бас, ҳаргиз шак қилувчилардан бўлма», деган («Юнус» сураси, 94-оят).

Маълумки, Пайғамбаримиз соллаллоҳу алайҳи васаллам бир лаҳза ҳам Қуръони Каримнинг ҳақ эканига шубҳа қилмаганлар. Аммо бу ояти каримада:

«Агар сенга Биз нозил қилган нарсадан шакда бўлсанг, сендан олдин китобни ўқиганлардан сўра», дейилмоқда.

Яъни Аллоҳ таоло «Сендан олдин ҳам Қуръонга ўхшаш илоҳий китоблар нозил қилганмиз. Уларнинг давомчилари ҳозир ҳам бор, ана ўшалардан сўра», демоқда. Хўш, нима учун бундай демоқда?

Бу ерда гап Пайғамбар соллаллоҳу алайҳи васалламнинг шахсларига тегишли эмас, балки ушбу оятлар нозил бўлаётган вақт шу сиёқдаги баённи тақозо қилар эди.

Маккада узоқ вақт Ислом даъвати ривож топмай, туриб қолди. Хадижа онамиз ва Абу Толибнинг вафотларидан сўнг кофирларнинг озорлари яна ҳам кучайди. Исро ҳодисаси бўлиб, Пайғамбар соллаллоҳу алайҳи васаллам бир кечада Маккаи Мукаррамадан Байтул Мақдисга, у ердан осмонга чиқиб, меърож қилиб қайтганларидан сўнг баъзи кишилар бу ҳодисага ишонмай, Исломни тарк этдилар.

Ана шундай нозик бир пайтда тасбит ва қўллаб-қувватлаш зарурлигидан Аллоҳ таоло ушбу оятни нозил қилди.

Оятнинг давомида:

«Батаҳқиқ, сенга Роббингдан ҳақ келди. Бас, ҳаргиз шак қилувчилардан бўлма», дейилмоқда.

Яъни «Сенга Роббингдан келган Қуръон ҳақдир. Ҳеч-ҳеч шак-шубҳага бора кўрма».

Аллоҳ таоло яна:

«Алиф Лаам Ро. (Бу –) оятлари мустаҳкам қилинган, сўнгра Ҳакийм ва Хобийр Зот томонидан муфассал (баён қилинган) Китобдир», деган («Худ» сураси, 1-оят).

«Эй одамлар, сизларга ушбу зикр қилинганга ўхшаш ҳарфлардан ташкил топган Қуръон келди. Унинг **«оятлари мустаҳкам қилинган»**.

Яъни, унинг тузилиши пухта, далолат қилиши дақиқ, ҳар бир сўзи чуқур маъноли, ҳамма тарафи бир-бирига муносиб, ҳеч камчилиги йўқдир.

«...сўнгра Ҳакийм ва Хобийр Зот томонидан муфассал (баён қилинган) Китобдир».

Нимасини батафсил баён қилиш керак бўлса, ўша нарсаси, жумладан, ғоялари, мақсадлари, мавзулари батафсил баён қилингандир.

Аллоҳ таоло яна:

«Алиф Лааам Ро. Ушбулар очиқ-ойдин китобнинг оятларидир. Албатта, Биз уни арабий Қуръон этиб нозил қилдик, шоядки, ақл юритсангиз. Биз сенга ушбу Қуръонни ваҳий қилишимиз ила қиссаларнинг энг гўзалини ҳикоя қилурмиз. Ҳолбуки, ундан олдин беҳабарлардан эдинг», деган («Юсуф» сураси, 1-3-оятлар).

Алиф, лом, ро каби ўзингизга таниш ҳарфлардан таркиб топган оятлар жамланиб, ушбу очиқ-ойдин Китобни вужудга келтирган.

Бу Китоб ҳарфларининг инсонга ёт бўлган жойи йўқ. Улар араб тилининг ёзув белгиларидир. Аллоҳ таоло Ўз Китобини шу ҳарфлар ила араб тилида нозил қилишни ирода этди.

«Албатта, Биз уни арабий Қуръон этиб нозил қилдик, шоядки, ақл юритсангиз».

Ҳа, бу Китоб оятлари ўша ўзингиз билган ҳарфлардан ташкил топган арабий Китоб, араб тилидаги Қуръондир. Уни Аллоҳ таоло нозил қилди.

«...шоядки, ақл юритсангиз».

Шоядки ақл юритиб, бундай мўъжизакор Китобни фақат Аллоҳ таолонинг Ўзигина келтира олиши мумкинлигини англаб етсангиз.

Эй охири замон Пайғамбари!

«Биз сенга ушбу Қуръонни ваҳий қилишимиз ила қиссаларнинг энг гўзалини ҳикоя қилурмиз. Ҳолбуки, ундан олдин беҳабарлардан эдинг».

Яъни «Қуръон деб номланган илоҳий китобимизни ваҳий ила нозил этиш жараёнида сенга энг гўзал қиссани ҳам айтиб берамиз. Сен қавминг ичида ўқиш-ёзишни ўрганмаган, бундай қиссалардан хабарсиз кишилардан бири эдинг. Энди эса Аллоҳнинг инояти ила булардан хабардор бўласан ва уларни халққа етказасан.

«Ҳадис ва ҳаёт» китобининг 30-жузи

Ушбу китоб Ўзбекистон Республикаси Дин ишлари бўйича қўмитанинг 2024 йил 23 январдаги 03-07/362-рақамли хулосаси асосида тайёрланди.